

Heiqmoegyau Guengjsae——

Cungj Yisuz Feihyiz Gwnzfwngz

广西木偶戏——手上的非遗艺术

□ Maknam hoiz

“Vunzfaex, vunzfaex, caen lumj vunz; heiqmoegyau, heiqmoegyau, gig lumj vunzcaen bae yienjheiq”. Neix dwg coenz vah riuz youq gwnzbiengz guek raeuz. Cienzgangj, heiqmoegyau guek raeuz “Hanciuz ok, Dangzciuz hoengh”, Samguek seiz gaenq miz vunz aeu moegyau yienj cazgi, Suizciuz cix aeu bae yienj gojgaeq. Heiqmoegyau Guengjsae gig miz daegsaek, yienjok minzsug, goj fangz, goj lwgnyez, goj gwzming daengj.

Moegyau ndawheiq yienhceij gyaqciq, lumjliuxliux, diuhfwen baez bienq, bak, da moegyau lij riengz dwk hai haep, cienq bae cienq dauq, gwnzndang youh miz gihgvanh; daengx duz maqhuz mbaeu, heih dawz heih loengh; moegyau faen guh swnggh, dan, couj, gungh, boz, cing daengj; caiq miz moegyau bengcag, moegyau gwnz byaidwngx, moegyau unq daengj, ndangdaej moegyau yied daeuj yied lumj vunzcaen; heiq cix daj moegyau gagdog biujyienj bienqbaenz vunzcaen caeuq moegyau doengzdaiz yienj; miz heiqyienhdaih, youh miz heiqdoenghbaez, sengdoengh lingzvued; diuhfwen miz go Guengjdoeng, fwen Bouxcuengh, siujdiuh gwnzbiengz, go yienhdaih daengj; foux cix sezgi ndaej gig ndei, cab miz gohgi yienhdaih, ndeiawj dangqmaz.

Aen Heiqduenz Moegyau Guengjsae dwg gij daibyauij heiqduenz moegyau gih raeuz. Aen heiqduenz neix yienjok 《Cejsam Roengz Biengz》《Cuh Bazgai Ciucin》《Gij Byauhyij Hungzginh》《Lwgnyez Hoengz》《Dahfwngzmeh》daengj, youq ndawgih rog-gih, ndawguek rogguek cungj mizmingz. 《Lwgnyez Hoengz》dwg cit heiq moegyau goj fangz, daj aen goj “Gyauj Hingz Lwgnyez Hoengz” laeng 《Sih Youz Geiq》daih seiqcib baez daengz daih seiqcib ngeih baez gajbien daeuj. Dangz Swnggh, Sunh Vugungh, Lwgnyez Hoengz daengj moegyau gak miz daegsaek, cang ndaej gig caen,

heiqdaiz sezgi gyaunde. Cit heiq neix miz haujlai heiqfoux, naengh fwj mbin, diucieng, byoq hoenz byoq feiz, hawj vunz nyaenx mbouj ndaej bekwngz hemqndei, bouxlaux lwgnyez cungj haengj yawj.

Seizdaih bienq lo, heiqmoegyau caemh mboujduenh cauhoq. Lumjbaenz 《Lwg Byavunzgyaeu》dwg bouh daih’it heiq fouxbaheiz moegyau laeng seiqgyaiq, fouxbaheiz caeuq moegyau doxgap, youh geizheih youh moq, daizheiq gig miz gohgigaj, lij aeu ndaej gimciengj Gaiq Daihngaih Moegyau Beizingj Daengx Guek Doxdax “Gimsae Ciengj”. Cit heiq 《Saeng Bwngaeq》dwg cit heiq youqgaenj Swcigih aeu bae soengqlaex hoh aendangj laebbaenz 100 hopbi ndeu. De gangj le “Daeghaij” lwgsai ndaej 12 bi neix, daj ndaw youzhi VR dauqma daengz 80 bi gonq, bungz daengz boux yinghyungz iq dinghoenx Yizbnw ndeu caemh heuhguh “Daeghaij”. Songde doxbang doxbaengh, dawz “fungh saeng bwngaeq seiqvunz ceiq youqgaenj ndeu” soengq daengz ndawfwngz hungzginh. Cit heiq neix miz 100 lai duz moegyau caeuq beizingj, yienj ndaej engq lizdij, engq lumj gij caen de; heiqyienhdaih lij miz yauzugun, cix naeuz cix ciengq daengj biujyienj.

Gih raeuz Bwhhaij, Bwzliuz, Bwzswz Cingsih caeuq Dwzbauj, Gveibingz daengj dieg lij miz yisuzdonz youq gwnzbiengz biujyienj heiqmoegyau. Yienznaeuz gij biujyienj funghgwz gak dieg gak mbouj doengz, hoeng, gyoengqde lij gangj Vahdoj, eu fwen dieg de, aeu moegyau geggangj gojgaeq, mbouj gouz okmingz ciepcienz aen yisuz conzdungj neix.

Vih ciepcienz aen yisuz gaeuqgeq neix, moix daengz cietheiq ngoenzgyaj, Aen Heiqciengz Lwgnyez Guengjsae cungj daegdaengq hai aen ciengz yienj heiqmoegyau. Bi 2014, heiqmoegyau Guengjsae ndaej senj haeuj buek daihhaj swcigih gaep feihyiz mingzloeg.



▲Cit heiq 《Gwnzlaeuz Doxiek》.

Aen Heivienh Lwanvex Guengjsae

▼Cit heiq 《Saeng Bwngaeq》.

Cunghgoz Dunghmungz Vwnzva Yisuz Vangj

